



TIMBALAN MENTERI SUMBER MANUSIA

KENYATAAN MEDIA

PEMERKASAAN TVET DALAM BELANJAWAN 2024

“REFORMASI EKONOMI, MEMPERKASA RAKYAT”

1. Kementerian Sumber Manusia (KSM) menyambut baik Belanjawan 2024 yang bertemakan “Reformasi Ekonomi, Memperkasa Rakyat” yang bersifat Responsif, Bertanggungjawab dan Reformis bagi memastikan kesejahteraan rakyat Malaysia yang telah dibentangkan oleh YAB Perdana Menteri merangkap Menteri Kewangan pada 13 Oktober 2023 yang lalu di Dewan Parlimen.
2. Justeru, dalam sidang media ini, saya ingin memfokuskan beberapa inisiatif yang dibentang dalam Bajet 2024 khususnya berkaitan Pendidikan dan Latihan Teknikal dan Vokasional (TVET). Ini merupakan bajet khusus dalam memastikan generasi muda negara dapat dilatih sebagai tenaga mahir yang kompeten dan berkualiti.
3. Melalui pengumuman Bajet 2024, Kerajaan telah memperuntukkan keseluruhan RM6.8 bilion bagi memperkasakan bidang TVET merentas 12 kementerian. Ia melibatkan RM100 juta bagi menyediakan pensijilan profesional yang diiktiraf industri kepada graduan TVET dan sebagai insentif kepada industri untuk bekerjasama dengan institusi TVET awam.
4. KSM melalui Human Resource Development Corporation (HRD Corp) juga terus komited memangkin pembangunan modal insan menerusi inisiatif-inisiatif peningkatan kemahiran dan kemahiran semula. Ini akan dilaksanakan menggunakan peruntukan RM1.6 bilion levi pembangunan manusia untuk 1.7 juta jumlah latihan.
5. HRD Corp juga akan menjayakan Program Latihan MADANI. Inisiatif ini akan direalisasikan menerusi pewujudan dana khas dengan pengasingan 15% daripada sebahagian caruman levi majikan yang tidak diguna pakai oleh majikan mengikut tempoh yang telah ditetapkan oleh HRD Corp sepertimana diperuntukkan oleh Akta

PSMB 2001. Dana khas ini akan digunakan untuk menyokong usahawan Perusahaan Mikro, Kecil dan Sederhana (PMKS) serta akan membantu golongan rentan seperti bekas banduan, OKU, warga emas dan pesara. Ini merupakan berita baik untuk pengusaha PMKS di Sabah untuk didedahkan dengan kaedah pengurusan dan teknologi baharu.

6. Malah, pada tahun hadapan HRD Corp juga akan menyediakan dana kredit kemahiran atau MySkills Credit bagi membiayai program latihan kemahiran individu pilihan sendiri.
7. Manakala, melalui Perbadanan Tabung Pembangunan Kemahiran (PTPK) dengan Dana Latihan TVET berjumlah RM180 juta ringgit akan menyediakan pinjaman Pendidikan kepada 12 ribu pelatih yang mengikuti Program Persijilan Kemahiran. RM20 juta ringgit dikhaskan untuk manfaat pelatih yang mengikuti bidang maritim, kesenian di ASWARA dan penyelenggaraan, pembaikan dan baik pulih (MRO) bagi sektor aeroangkasa. Dana ini juga akan memperuntukan sebahagian untuk kos logistik kepada anak-anak Sabah dan Sarawak sebagai insentif tambahan.
8. Bagi mengekang kekurangan bakat tempatan dan ketidakpadanan kemahiran, Program Academy in Industry (Aii) akan dilaksanakan untuk menyediakan kemahiran sambil bekerja dalam tempoh sehingga 18 bulan dengan peruntukan sebanyak RM70 juta ringgit. Seterusnya, sebanyak 17 juta ringgit disediakan untuk melaksanakan Program Tahfiz TVET. Program ini akan membuka peluang kepada pelajar tahfiz mempelbagaikan kemahiran di samping meneruskan pengajian hafazan.
9. Dalam hal ini, saya di kementerian sedang dalam membangunkan kerangka penubuhan Institusi Latihan Perindustrian (ILP) Ulul Albab dengan menggunakan dan mentransformasi ILP sedia ada. ILP Ulul Albab ini akan menawarkan program-program TVET dalam masa yang sama menawarkan kursus menghafaz Al-Qur'an yang lebih berstruktur. Inisiatif ini akan memberi nilai tambah kepada para huffaz dan sudah pasti kita ingin melahirkan generasi teknokrat MADANI.
10. Melalui PERKESO juga, dua inisiatif yang turut dilanjutkan adalah Program Latihan Bina Kerjaya sebanyak RM35 juta bagi membiayai yuran latihan dan insentif gentian pendapatan kepada 9,000 pekerja gig yang menghadiri latihan. Skim Sokongan Pekerjaan di Sektor Swasta sebanyak RM30 juta juga akan memanfaatkan sasaran kepada golongan rentan seperti bekas banduan, Orang Kelainan Upaya (OKU), warga emas dan pesara. Ini merupakan sebuah bajet inklusif merentas sektor yang membolehkan kita dapat melahirkan pekerja mahir yang lebih ramai.
11. Bagi memastikan pendidikan kerjaya dapat dipupuk seawal di bangku sekolah lagi, PERKESO akan melaksana Program Eksplorasi Kerjaya bagi mendedahkan laluan

dan peluang kerjaya kepada pelajar sekolah dan juga guru kaunseling. Malah, PERKESO turut mewujudkan Pusat Penempatan dan Penerokaan Kerjaya Kebangsaan sebagai pusat sehenti untuk graduan muda dan pencari pekerja mendapatkan sokongan kerjaya dan pekerjaan.

12. Sebagai rekod, usaha memperkasa TVET tahun ini melalui Belanjawan MADANI 2023 telah memulakan secara rintis usaha merombak pendidikan TVET negara melalui kerjasama dengan syarikat berkaitan kerajaan (GLC) dan swasta dengan 17 GLC dan 44 syarikat swasta telah terlibat dalam pemeteraian 61 memorandum kerjasama dan memorandum persefahaman. Penglibatan industri dalam mengurus perdana TVET akan terus diperkukuh pada tahun hadapan.
13. Bagi menggalakkan rakyat meningkatkan kemahiran serta menceburi bidang baharu, kerajaan dalam Bajet 2024 juga melanjutkan pelepasan cukai sehingga RM2,000 bagi yuran kursus peningkatan kemahiran atau kemajuan diri hingga tahun taksiran 2026.
14. Sesungguhnya, saya amat yakin dengan peruntukan yang dibentangkan oleh YAB Perdana Menteri merangkap Menteri Kewangan berkaitan TVET akan dapat memastikan TVET akan terus diperkasa dan mampu merubah mentaliti bahawa TVET bukan lagi pilihan alternatif terakhir. Setakat tahun ini juga, permohonan kemasukan ke institusi TVET sudah meningkat lebih daripada kapasti institusi TVET. Dijangka bajet tambahan untuk dana latihan TVET diperlukan melalui PTPK untuk menampung peningkatan mendadak ini. Ia adalah petanda positif yang menunjukkan rakyat Malaysia mula memberi perhatian kepada TVET.
15. Komitmen kerajaan untuk memperkasa TVET ini juga akan memacu kepada pencapaian 35% tenaga mahir pada tahun 2030. Bertepatan dengan hasrat memperkasa TVET, Majlis TVET Negara telah meminta KSM sebagai Sekretariat merangka Dasar TVET Negara yang akan menjadi asas dan rujukan utama kepada pemerikasaan TVET Negara pada masa akan datang. InsyaAllah.
16. Justeru itu, KSM akan terus komited bagi memastikan inisiatif pemerikasaan TVET yang dipertanggungjawabkan kepada KSM terlaksana dan memastikan penggunaan bajet yang diperuntukan dapat digunakan secara optimum dan mewujudkan sinergi dan kolaborasi kukuh antara kementerian dan penyedia latihan TVET.

PERUNTUKAN 2024 UNTUK WILAYAH SABAH

17. Dalam kesempatan ini, saya sebagai salah seorang pemimpin yang datang dari Negeri Sabah juga ingin merakamkan ucapan penghargaan terima kasih kepada YAB Perdana Menteri atas peruntukan pembangunan untuk Sabah berjumlah

RM6.6 bilion menerusi Belanjawan 2024. Peruntukan ini adalah manifestasi dukungan Kerajaan Perpaduan menyeimbangkan pembangunan antara wilayah Semenanjung, Sabah dan Sarawak. Peruntukan ini perlu disalurkan dengan kadar segera tahun hadapan agar pelaksanaan projek dapat dimulakan seawal mungkin.

18. Peruntukan pemberian khas tahun depan sebanyak RM300 juta berbanding RM125.6 bagi Negeri Sabah pada tahun lalu adalah juga sebahagian usaha Kerajaan Persekutuan memenuhi pelaksanaan Perjanjian Malaysia 1963 (MA63) yang termaktub dalam Perlembagaan Persekutuan Perkara 112D.
19. Saya juga menyeru agar Kerajaan Negeri Sabah dapat melaksana dan memantau projek-projek prioriti melibatkan projek-projek infrastruktur asas agar ia dapat dinikmati oleh rakyat Sabah dalam jangka masa yang ditetapkan. Saya juga percaya, dengan memberikan kuasa pelaksanaan projek pembangunan di bawah nilai RM50 juta kepada agensi teknikal hanya di peringkat negeri, ia akan mempercepat proses kelulusan sehingga peringkat pelaksanaan projek pembangunan.

PENUTUP

20. Saya percaya Bajet 2024 “Reformasi Ekonomi, Memperkasa Rakyat” akan memangkin kekuatan ekonomi Malaysia. Terutamanya dalam melahirkan bakat tempatan yang berkemahiran dan berpendapatan tinggi serta mengurangkan kebergantungan dengan pekerja asing.

YB DATUK Ts. MUSTAPHA SKAMUD
TIMBALAN MENTERI SUMBER MANUSIA
PUTRAJAYA
21 OKTOBER 2023